

## PRAKATA PENERUS

Assalamualaikum dan Salam Sejahtera.

Saya ingin mengambil kesempatan ini untuk mengucapkan tahniah kepada semua warga Suruhanjaya Syarikat Malaysia (SSM) yang terlibat dalam penerbitan Laporan Tahunan SSM 2021.



**YBHG. DATUK SERI HJ. HASNOL ZAM ZAM BIN HJ. AHMAD**  
*Pengerusi*  
*Suruhanjaya Syarikat Malaysia*

Tahun ini merupakan tahun kedua saya berkhidmat sebagai Pengerusi SSM. Tahun ini juga menjadi lembaran baharu kepada Malaysia dalam mendepani wabak COVID-19 dengan kadar vaksinasi lengkap bagi populasi dewasa di bawah Pelan Imunisasi COVID-19 Kebangsaan (PICK) yang telah mencapai 90 peratus. Pencapaian ini sekaligus telah mendorong kepada pemulihan ekonomi negara dengan pembukaan semula premis kedai makan, kedai-kedai runcit, pusat beli-belah, fasiliti-fasiliti sukan termasuk gimnasium, pejabat-pejabat dan lain-lain.

Sejak awal tahun 2020 hingga 2021, negara kita dan seluruh dunia telah diuji dengan pandemik COVID-19. Cabaran ini bukan sahaja menguji kekuatan kita secara individu, tetapi juga menguji daya ketahanan kita sebagai sebuah organisasi yang bertanggungjawab mengawal selia komuniti perniagaan di negara ini. Dengan ancaman pandemik COVID-19 yang terus meningkat, semua warga SSM perlu meningkatkan lagi langkah berjaga-jaga dan mematuhi SOP yang ditetapkan semasa menyampaikan perkhidmatan kepada pelanggan.

Dalam mendepani pandemik COVID-19 yang telah memberi impak kepada sektor korporat dan perniagaan, SSM telah memperkenalkan 11 inisiatif pada tahun 2021 bagi meringankan beban golongan yang terkesan. Inisiatif tersebut termasuklah memperkenalkan moratorium 30 hari selepas tamat tempoh *Total Lockdown* untuk menyerah simpan dokumen berkanun di bawah Akta Syarikat 2016 dan Akta Perkongsian Liabiliti Terhad 2012 dengan pengecualian fi lewat serah simpan. Inisiatif ini dilaksanakan setelah meneliti keadaan ekonomi global dan dalam negara yang

## PRAKATA Pengerusi

mungkin mengambil masa lebih lama untuk pulih akibat pandemik COVID-19.

SSM juga telah memperkenalkan pelbagai inisiatif lain antaranya pengurangan kompaun sehingga 90% daripada nilai asal bagi permohonan pembatalan nama syarikat di bawah seksyen 549/550 Akta Syarikat 2016 sehingga 31 Disember 2021 dan menaikkan nilai ambang keterhutangan dari RM10,000 kepada RM50,000 secara kekal berkuat kuasa pada 1 April 2021. Selain itu, SSM telah memberi lanjutan masa sehingga 90 hari bagi syarikat dengan tahun kewangan berakhir 1 November 2020 hingga 31 Januari 2021 untuk mengedarkan penyata kewangan, mengadakan Mesyuarat Agung Tahunan, menyerah simpan penyata kewangan dan pengecualian fi permohonan lanjutan masa serta pelbagai inisiatif lain yang telah diumumkan dari semasa ke semasa dengan mengambil kira pandangan pelbagai pihak.

Dalam usaha untuk memperkukuhkan tadbir urus korporat syarikat, SSM sedang menyediakan Rang Undang-Undang Syarikat (RUU Syarikat) dan Rang Undang-Undang Perkongsian Liabiliti Terhad (RUU PLT). Pada ketika ini, RUU Syarikat sedang dalam proses dimuktamadkan oleh Bahagian Gubalan Jabatan Peguam Negara. Selepas itu, RUU PLT pula akan dimuktamadkan berdasarkan gubalan peruntukan-peruntukan yang telah dipersetujui berkaitan Mekanisme Penyelamat Korporat di bawah RUU Syarikat.

Kedua-dua draf RUU Syarikat dan PLT ini akan dibentangkan di Parlimen dalam masa terdekat. Antara cadangan di dalam RUU tersebut ialah penambahbaikan Mekanisme Penyelamat Korporat dan Skim Kompromi atau Perkiraan di bawah Akta Syarikat 2016 dan pengenalan Mekanisme Penyelamat Korporat di bawah Akta Perkongsian Liabiliti Terhad 2012. Penambahbaikan ini adalah penting untuk membantu sektor korporat yang menghadapi masalah kewangan, terutama sekali akibat dari kesan pandemik COVID-19 terhadap ekonomi negara serta peranan SSM dalam menyokong inisiatif berterusan oleh Kerajaan.

Selain itu, kajian berhubung impak sektor gig ekonomi terhadap keperluan pendaftaran di bawah Akta Pendaftaran Perniagaan 1956 merupakan sebahagian daripada kajian pembaharuan undang-undang yang sedang dibuat bagi tujuan memodenkan APP 1956 selaras dengan trend perniagaan kini. Ingin saya berkongsi kepada semua bahawa gig ekonomi ialah satu pekerjaan yang dijalankan tanpa majikan dengan menjual perkhidmatan mereka kepada orang lain tidak kira secara sepenuh masa atau separuh masa.

Di samping itu, saya ingin memetik ucapan YAB Perdana Menteri Dato' Sri Ismail Sabri Yaakob pada 23 Oktober 2021 iaitu semasa Majlis Pelancaran Keluarga Malaysia. Dalam majlis tersebut, beliau telah menyeru agar setiap kementerian memperkenalkan

program dan inisiatif bagi membantu mengurangkan kesan ekonomi akibat pandemik COVID-19. Seiring dengan seruan ini, SSM telah merangka program-program yang memberi fokus kepada golongan B40 dan pelajar IPT sepenuh masa bagi mempromosikan Skim Pendaftaran Perniagaan Prihatin (SPPP) melalui penganjuran Program Bimbingan Usahawan 21 (PBU21) dan Program Usahawan Muda 21 (PUM21).

**Alhamdulillah, kesemua program ini telah berjaya mencapai jumlah pendaftaran sebanyak 429 peserta PBU21 dan 3,308 peserta PUM21 yang dilaksanakan bertujuan untuk menggilap potensi golongan B40 dan pelajar IPT sepenuh masa dan menggalakkan mereka melibatkan diri dalam bidang perniagaan seterusnya menyumbang kepada pembangunan ekonomi negara.**

Saya berharap SSM sebagai pengawal selia sektor korporat dan perniagaan akan terus mengekalkan prestasi yang baik ini dalam amalan penguatkuasaan seimbang dan pada masa yang sama cakna serta prihatin terhadap keperluan pemegang taruh SSM. Hal ini penting untuk menyokong pertumbuhan ekonomi yang inklusif dan pembangunan mampan seperti yang dinyatakan dalam Rancangan Malaysia ke-12.

Saya yakin bahawa SSM memiliki kepakaran, pengalaman serta kewibawaan dalam penyediaan perkhidmatan yang lebih cemerlang kepada pihak berkepentingan di masa hadapan. Saya ingin mengambil kesempatan ini untuk mengucapkan terima kasih kepada semua pihak berkepentingan, Anggota Suruhanjaya, barisan Pengurusan Eksekutif dan warga kerja SSM di atas sokongan, dedikasi dan sumbangan mereka yang berterusan. Semoga komitmen dan semangat kerja berpasukan ini akan terus dikekalkan pada masa akan datang.

**YBHG. DATUK SERI HJ. HASNOL ZAM ZAM BIN HJ. AHMAD**

*Pengerusi*

*Suruhanjaya Syarikat Malaysia*